

**Date – 17/01/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Champhai Joint NGO chuan Champhaia zirna sang zawk dah turin sorkar nawr an tum tih an sawi.
2. Rajya Sabha MP Pu K.Vanlalvena'n tunkar chhung khan Thingsai leh Sangau inkar Kawngpui sial laih mek leh Tuipui D lei thar siam tur a enfiah.
3. Prime Minister Narendra Modia chuan vawiin khan Vande Bharat Sleeper Train hmasa ber Howra leh Guwahati (Kamakhya) inkara tlan tur chu Malda khuaa rel station atangin a vailiam.
4. Prime Minister Narendra Modia chuan ni hnih cham turin vawiin tlai khan Assam a thleng



**CHAMPHAI JT NGO**

Champhai Joint NGOs -Sub-hqrs.YMA, MHIP, MUP leh MZP Hqrs. chuan vawiin khan chanchinbumite kawmin Champhaia zirna sang zawk dah turin sorkar nawr an tum tih an sawi.

MZP Hqrs. President Pu H.Lalruatdika chuan Mizoram hmun dangte ngaihtuah in Champhai district chu zirna lamah a la hnufum nia an hriat thu sawiin, MZU/Mizoram State University Eastern Campus din tura sawrkar hotute an lo nawr tawhah beiseina an neih san loh thu leh University Eastern Campus dah a nih loh pawhin Govt.Champhai College ah stream 4-Arts, Commerce, B.C.A leh Science zirna awm mek bakah he college ah hian Post Graduate zirna tal sawrkarin dah tura an beisei thu leh, a tul ang zela an nawr dawn thu a sawi a.

Champhaiah State University Eastern Campus dahin Pro-Vice Chancellor in thut chilh se an duh thu Champhai Joint NGO te chuan an sawi a. Hei hi nakin zela NEP hmalakna kalpui nan a tangkai dawn thu sawiin Mizoram State University hi Lungleiah a awm dawn a nih chuan Lunglei kal kher lova basic level paper work tal pawh Champhaiah a tih ve theih dawn thu an sawi a. School pahnih khat tal Champhaiah dah ve ni se an duh thu sawin hei hi University hmasawn nan leh Mizoram zirna insemrual nan a pawimawh thu an sawi a ni.

Champhai Joint NGO te chuan Champhai chu India sorkar policy, Act East Policy atan hmun tangkai tak a nih avangin tih hmasawn a pawimawh hle nia an

hriat thu an sawi a. Champhaiah emaw khawchhak lamah emaw hian National emaw State level zirna in engmah dah a ni ve lo tih sawiin Lunglei chu population ah pawh an ni aia an tam viau hran tawh loh thu an sawi a. Mizoram State University Lunglei a awm theih nan an MLA te ban hial huama an tang na ngam angin an MLA te pawh an tan nat ngam ve ngei an beiseiin an phut tih an sawi a, mipuite tawiawmna an mamawh thu an sawi bawk a ni.



## **PHE**

Public Health Engineering (PHE) department hotute chuan thal thleng mekah mipuite tui in tur pek kawngah harsatna liantham a la thleng rih lo an ti.

Akashvani News zawhna chhangin PHE department hotute chuan tun dinhmunah Aizawl khawpui chawmtu khawl Phase I, II leh III ten tuang taka tui an pump reng thu leh heng khawlah te hian chhia emaw, tuang lo emaw a awm rih loh thu an sawi a. Tui pump tur pawh a tam thawkhat rih thu sawiin tui pawh a thianghlim that thu leh tui nu avanga harsatna tawh thin pawh tunah chuan a awm lem loh thu an sawi a. Tui semtuten an duh zat an sawi ang chu an pek zel theih rih thu an sawi a, hetihrial hian an tui pekchhuahna kalkawng, pipe network la rualkhai tawk lo avangin veng thenkhat han harsa leh zeuh thin erawh a awm theih thu an sawi a ni.

PHE department hotute chuan thla thar February thla chho thleng hi chuan harsatna an tawk rih lo tura an ngaih thu sawiin kumdangah chuan March thla chho atangin tui a tlem thin an ti a. Hetah hian tui lakna hnar bulah thal tui harsatna sukiang turin tui an khuah thin thu sawiin tunah hian tuia harsatna a awm loh nan reilote atana khuap loin a ngheta Phase II tui khuahna atanga km 3-ah meter 8 vela sang tui khuahna tur ruahmanna an neih mek thu leh hei erawh hi chu hna liantham deuh anih avangin hun la duh hret tur a nih thu an sawi a ni.

Hetihlai hian Lunglei khawpui tui in tur lakna atana Tlawng Lui, Impounding Gravity Dam khuah mek chu March thla hma ngei a khuah zawh anih theih nan PHE Deptt Lunglei chuan Contractor pawh an tur chho mek zel a.

Lunglei PHED SE Pu Lalsanga chuan kumin chhungin vawi 6 a hmunah kal chilhin thal khawroa Lunglei khawpuiin tui in tur a harsatna an tawh loh nan theihtawp chhuah a ngaih thu a sawi a. January thla tira MJA leh Lunglei Dist. Consumer Assn(LDCA) ten tunkar chhung ngei a tuikhuah hnawhpinna Valve vuah tur a Contractor an ngenna angin Contractor pawhin Lui a JCB luh theih nan a panna lung khawkrawk kar a leichhun vum hna pawh an thawk zo thawkhat tawh tih sawiin naktuk Pathiannah chuan Valve vuah theih an tum tih SE chuan a sawi a ni.

Ramzotlang a lut tur Pipe lian phum hna pawh thawh mek a ni.



## **PRISONERS**

Tun dinhmunah Mizoram chhunga tanin hrang hrangah tang mi 1669 an awm.

Prisons Department in vawiina an tihchhuah Mizoram Prisoners Daily Population Report-a tarlan a nih danin Mizoram lungina tang thei zawng zawng zat chu mi 1496 niin a awm thei zat bakah mi 482 an awm belh mek a. Hei hi Central Jail, Women's Jail, Aizawl District Jail, Lunglei District Jail leh Champhai District Jail te a a awm thei zat aia tam an awm vang a ni a. Hetihrial hian Siaha District Jail, Kolasib District Jail, Lawngtlai District Jail, Serchhip District Jail, Mamit

District Jail leh Saitual District Jail-ah te chuan a belhkhawmin mi 309 tan theihna hmunruak a awm thung a ni.

Prisons department tarlan danin tun dinhmunah District Jail, Saitualah tang an awm lo a. An nu leh pa te bula awm lo thei lo naupang 14 te lungin hrang hrangah hian an awm mek bawk a. Heng naupang te hi lungina awm mek zat belhkhawmah hian chhiar tel an ni.

<><><>

## **RS MP**

Rajya Sabha MP Pu K.Vanlalvena'n tunkar chhung khan Thingsai leh Sangau inkar Kawngpui sial laih mek leh Tuipui D lei thar siam tur a enfiah.

India leh Myanmar inrina kawng laih mek Hnahthial District-a Bualpui H leh Lawngtlai District a Pangkhaw inkara hna thawktu BRO ten Compensation harsatna chhuanlam avanga kum 2021 atanga 2023 inkara hnathawh an chawlhsan chu sawrkar laipua hotute hnenah hnathawh chhonzawm thuai tura a lo ngen thin tawh avanga hna chhonzawm leh tak thu MP Pu K. Vanlalvena chuan a sawi a. Pangkhua atanga Saisihchhuah Myanmar border road laihna tur atana DONER Ministry in kum 2021 a cheng vaibelchhe 66 a lo sanction tawh BRO ten hna an thawh loh avanga DONER Ministry in pawisa sanction tawh sa a hnuh kir vek hnuah sorkar laipua Ministry of Defence in Hnahthial District Bualpui H lam atanga kawngpui sial hna kum 2024 tawp lam atanga an lo chhonzawm leh thei ta chu lawmawm a tih thu Pu K. Vanlalvena chuan a sawi a ni.

Rajya Sabha MP chuan Bualpui H atanga Tiau leh Chhimtuipui infinna bul thlenga Border road laih mek chu tlawh in, Pangkhaw ram leh Bualpui H ram dawh zawm tu tur Chhimtuipui lui chung a Lei siam tur ban phunna lai tur chu BRO EE te nen an en ho nghal bawk a ni.

<><><>

## **CHRISTIAN HOSPITAL SERKAWN**

Lunglei Serkawn Christian Hospital chuan Mizoram Universal Healthcare Scheme (MUHCS), nikum June thla atanga an an zawm atang khan damlo ten a hma aiin an bawh tih Med Suptd Dr B.Laldinliana chuan a sawi.

Kan cvorr a hrilhg danin Dr B Laldinliana chuan an damdawiina Damlo admit tam zawk chu MUHCS hnuaiyah inziak lut an ni a, MUHCS an zawm hma a damlo 30 vel lek te awm thin kha tunah chuan mi 70 vel englai pawh a awm ang an ni a ti. CHS-ah hian khum 100 a awm a ni.

MUHCS zawm tu te ah hian an title anga awm te chu pawisa chawi bar lovin an chhuak mai thin a , amaherawhchu an entitlement in a huam loh, entirnan General ward a awm tur te khan cabin-a awm an duh anih erawh chuan pawisa an chawi belh thung thin a ni a ti.

<><><>

## **MCS COMBINED MAINS RESULTS DECLARED**

Mizoram Public Service Commission (MPSC) in Mizoram Civil Services (Combined Competitive) Examination, 2025 a kalpui meka nimina Mains result a tihchhuahah mi 66 an tling.

Nikuma MPSC in MCS Combined Competitive Examination a buatsaihah Preliminary Examination-ah Mains Exam hmachhawn turin mi 334 an tling a. Nikum October ni 22 atanga ni 30 inkar khan Mains exam hi buatsaih niin Mains Exam hmachhawn tura tling mi 334 zinga mi 320 in exam hi an hmachhawn a. Heng zingah hian mi 301 in exam hi bei tluanin exam chhawng thumna Personal Interview turin mi 66 an tling ta a ni.

Mains exam-a tling te hian tun thla ni 22 leh 23 chhungin medical exam an hmachhawn ang a. Personal Interview an neih ni tur erawh MPSC in an la tichhuak leh dawn a ni. Mizoram Civil Services (Combined Competitive) Examination, 2025 kapui mekah hian post 33 ruakin hetah hian Mizoram Civil Service post 15, Mizoram Police Service post 8, Mizoram Finance & Accounts Service post 2 leh Mizoram Information Service post 8 a ruak a ni.

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### **VANDE BHARAT**

Prime Minister Narendra Modia chuan vawiin khan Vande Bharat Sleeper Train hmasa ber Howra leh Guwahati (Kamakhya) inkara tlan tur chu Malda khuaa rel station atangin a vailiam a..Hei bakah hian internet kaltlangin Guwahati-Howrah Vande Bharat Sleeper Train a vailiam bawk.

Air Conditioner hmang Vande Bharat Sleeper train hian khualzinte tan thlawhna ang chiaha nuamsa leh man tlawm siin zin theihna remchang a siamsak dawn a. Hmun hla zawk te reilote in him zawkin a thlen theih dawn a. Vande Bharat Sleeper train ah hian pindan 16 a awm dawn a. passenger 823 an awm dawn a ni.

Union Railway Minister Ashwini Vaishnaw chuan heng relte hi a chhuak thar an nih thu sawiin tunlai technology thar ber ber hmanga thum a ni a. Ramchhungah tam tak siam chhuah a ni ang a ti bawk.

<><><>

#### **MODI IN ASSAM**

Prime Minister Narendra Modia chuan ni hnih cham turin vawiin tlai khan Assam a thleng. A cham chhung hian hmasawna project chi hrang hrang a hawn dawn bakah Amrit Bharat Express rel pahnih a vailiam dawn a. PM Modia hian Guwahati-a Bodo hnam ten programme an buatsaih Bagurumba Dwhou 2026, Arjun Bhogeswar Baruah Sports Complex a neih a hmanpui ang. Pu Modia hian Amrit Bharat Express rel a vailiam turte hi Kamakhya-Rohtak Amrit Bharat Express leh Dibrugarh-Gomti Nagar Amrit Bharat Express te an ni.

